



KEMENTERIAN TENAGA DAN SUMBER ASLI

KERATAN SURAT KHABAR

SURAT KHABAR	:	UTUSAN MALAYSIA			
TARIKH	:	26/8/2021 (KHAMIS)	MUKA SURAT	:	29
JABATAN	:	JMG			

UM, 26 Ogos
2021_29

Penduduk bimbang diancam operasi kuari

Oleh **MOHD. KHUZAIRI ISMAIL**
utusannews@mediamulia.com.my


GEORGETOWN: Ribuan penduduk di Sungai Ara dekat sini hidup dalam kebimbangan berhubung keselamatan mereka berikutan operasi kuari berdekatan kejiranan mereka ketika ini.

Aktiviti kuari yang beroperasi di Mukim 12, Daerah Barat Daya itu berada amat hampir dengan beberapa buah kawasan perumahan yang padat dengan sebahagiannya berjarak kurang dari 200 meter.

Salah seorang penduduk, Askin Meera, 55, berkata, dia yang tinggal di kejiranan Setia Pulau Mutiara III sudah berdepan dengan ancaman dari operasi kuari itu sejak mula menetap di situ kira-kira tujuh tahun lalu.

Bagaimanapun ujannya, ancaman daripada aktiviti pemecahan bongkah batu di kuari tersebut menjadi semakin serius sejak awal tahun ini sehingga menyebabkan penduduk berasa tidak selamat.

Jelas beliau, antara masalah yang terpaksa dihadapi penduduk termasuk keretakan pada dinding rumah dan lantai mereka serta habuk selain paling berbahaya adalah batu terbang yang menimpa kediaman mereka.



KESAN kemusnahan pada rumah penduduk ekoran operasi pemecahan batu kuari di Mukim 12, Sungai Ara, Pulau Pinang.

“Kami juga bimbang dengan lori-lori yang membawa muatan bahan batuan kuari yang boleh mengancam keselamatan pengguna jalan raya.

“Malah, kami sering terganggu dengan bunyi letupan kuat dan luar biasa dipercayai daripada projek kuari batu tersebut,” katanya kepada pemberita

di sini semalam.

Menurut Askin Meera, penduduk di kejiranan Setia Pulau Mutiara I, II dan III, serta Stramax Residences yang terjejas dengan operasi kuari itu telah menghantar surat kepada Ketua Menteri Pulau Pinang pada 23 Julai lalu bagi menyuarakan bantahan mereka.

